

मार्निंग डोगरी न्यूज बुलेटिन, समे. 09.20 Hrs

<><><><><><>

Headlines

1. प्रधानमंत्री नरेन्द्र अज्ज दिनै 11 बजे अपने रेडियो कार्यक्रम मन की बात दे राहें देश-बदेश दे लोकें कन्नै बचार सांझे करडन।
2. उपराज्यपाल मनोज सिन्हा होरें कैंप डरैक्टरें ते होरनें बड्डे ऐहलकारें दी इक उच्ची सतह दी बैठक लाइयै श्री अमरनाथ जी जातरा मार्ग पर जारी मरम्मती ते पुर्नबहाली आहले कम्में दा जायजा लैता।
3. मौसम च सुधार दे चलदे श्री अमरनाथ जातरा परतियै शुरु। अमरनाथ जातरा 4 लक्ख दे आंकड़े गी पार करने आहली ऐ। जम्मू थमां अज्ज बड्डलै अमरनाथ श्रद्धालुएं दा 19मां जत्था घाटी लेई रवाना।
4. 1999 दी कारगिल जंग दे दरान देसै लेई सर्वोच्च बलिदान देने आहले दलेर सैनिकें दे सम्मान च अज्ज समूलचा मुख्य कारगिल विजय दिवस मना करदा ऐ।
5. मौसम विभाग ने अगले 4 दिनें दरान प्रदेश दिएं किश संवेदनशील थाहें पर चानचक्क हाइ औने, ल्हास पस्सियां पौने ते जिमीं खिस्कने ज्नेई क्रोपिं दी शेंका जताई ऐ। जम्मू-श्रीनगर राश्ट्री जरनैली सिड़क अद्दे-दुब्बे तौर पर गड्डिं दी आओजाई लेई ब्हाल।

<><><><><><>

PM-MKB

प्रधानमंत्री नरेन्द्र मोदी होर अज्ज बड्डलै 11 बजे आकाशवाणी पर प्रसारित होने आहले महावार कार्यक्रम “मन की बात” राएं देश-विदेश दे लोकें कन्नै अपने विचार-सांझे करडन। हर महीने दे खीरी ऐतवार गी प्रसार होने आहले इस कार्यक्रम दी एह 136मी किशत होग। कार्यक्रम दा प्रसारण आकाशवाणी ते दूरदर्शन दे समूलचे नैटवर्क ए.आई.आर. न्यूज वेबसाईट ते न्यूज ऑन ए.आई.आर. Mobile App- डी.डी. न्यूज- प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर बी होग। हिंदी प्रसारण दे तुरत मगरा एहदा डोगरी भाषा च अनुवाद प्रसारित कीता जाहग।

<><><><><><>

Joshi New Edu. Min.

केंद्री मंत्री प्रहलाद जोशी होरें गी नमां शिक्षा मंत्री बनाया गेआ ऐ। उनेंगी उंदे मौजूदा विभागें दे कन्नोकन्नी शिक्षा मंत्रालय दी अतिरिक्त जिम्मेदारी सौंपी गई ऐ। प्रहलाद जोशी फिलहाल उपभोक्ता मामले, खाद्य ते सार्वजनिक वितरण ते नमीं ते अक्षय उर्जा मंत्रालय दा कार्यभार संभाला'रदे हे। तोआई, राष्ट्रपति द्रौपदी मुर्मू होरें केंद्री मंत्री धर्मेंद्र प्रधान हुं'दा केंद्री मंत्रिपरिषद शा इस्तीफा तुरत प्रभाव कन्नै मंजूर करी लैता ऐ।

<><><><><><>

LG-Restoration

उपराज्यपाल मनोज सिन्हा होरें कैप डरैक्टरें ते होरनें बड्डे ऐहलकारें कन्नै इक उच्ची सतह दी बैठक लाइयै हाल दिएं भारी बरखें मगरा श्री अमरनाथ जी जातरा मार्ग गी पुज्जे दे नुक्सान दे

मद्देनज़र उत्थे जारी मरम्मतती ते पुर्नबहाली आहले कम्मं दा जायजा लैता। उ'नें कम्म तोढ़ चाढ़ा करदी एजेंसिएं गी आखेआ जे ओह जातरा मार्ग गी बहाल करने दे कम्मै च तेजी आहनन ते खासकरियै ओकड़े हिस्सें गी मती तरजीह देन जित्थे ल्हास-पस्सियां कुप्पड़ पौने दी मती शेंका बनी दी रौंहदी ऐ। एल.जी होरें अधिकारिएं गी इब्बी निर्देश दिता जे ओह उच्चे प्हाड़ें पर बचाs अभियान चलाने आहली टीमें गी होर तगड़ा बनाने दे कन्नो-कन्नी इस गल्लै गी बी जकीनी बनान जे मौसम दी ताजा-तरीन जानकारीयां कन्नो-कन्नी गै श्रद्धालुएं धोड़ी पुज्जदिआं रौहन। उ'नें जोर देइयै आखेआ जे श्रद्धालुएं दी सुरक्षा ते श्री अमरनाथ जी दी जातरा गी बवस्थित ढंगै'नै करोआना प्रशासन दी सबनें शा उच्ची प्राथमिकता ऐ।

<><><><><><>

Rana-Surankote Visit

जल शक्ति मंत्री जावेद अहमद राणा होरें कल सुरनकोट दे विधायक चौधरी मोहम्मद अकरम लसानवी हुं'दे कन्नै जिला पुंछ दी तहसील सुरनकोट दे दारा सांगला गांs दा दौरा लाया। दौरै दरान मंत्री होरें गांs च हाड़ें ते ल्हास-पस्सियां पौने करी प्रभावित परौआरें कन्नै मलाटी कीती। इस हादसे च होए दे जानी नुकसान पर डूंगा बसोस प्रगट करदे होई उ'नें सौगी परौआरें कन्नै दिली हमदर्दी जताई। प्रभावित परौआरें गी हर मुमकिन मदाद उपलब्ध करोआने दा भरोसा दोआंदे होई राणा होरें आखेआ जे सरकार कुदरती क्रोपी करी प्रभावित सबनें लोकें दी मदाद लेई बचने-बज्झी दी ऐ।

<><><><><><>

Div Com Rain Damage

जम्मू दे डिविजनल कमिशनर रमेश कुमार होरें समूलचे जम्मू संभाग च बरखा करी होए दे नुकसान ते परतियै बहाली आहले कम्में दा जायजा लैता ते अधिकारियें गी आखेआ जे ओह इस गल्लै गी जकीनी बनान जे जरूरी सेवाएं गी बवस्थित ढंग्गै कन्नै चलाया जा। इक उच्ची सतह दी बैठक दरान उनें विभागें गी आखेआ जे ओह बिजली, पानी ते शिड़कें गी पटरी पर आहनने गी तरजीह देन ते प्रभावित परौआरें गी माली मदाद देने च तेजी आहनन। उनें डिप्टी कमिशनरें गी 29 ते 30 जुलाई गी होने आहली संभावित बरखा शा पैहले जरूरी चीजें-बस्तें दा भंडारण करने लेई बी आखेआ। एहदे अलावा उनें अधिकारिएं गी निर्देश दिते जे ओह हाई सरबन्धी तैयारिएं गी होर निग्गर बनान, लोड़चदी दवाइयां अपने कोल रक्खन, फसलें दे नुकसान दी जांच करन ते इस गल्लै गी यकीनी बनान जे लोकें गी समें-सिर सलाह जारी कीती जा।

<><><><><><>

Amarnath Yatra

सलाना श्री अमरनाथ जी दी जातरा 4 लक्ख दे आंकड़े गी पार करने आहली ऐ। हुनै धोड़ी तकरीबन 3 लक्ख 95 जहार श्रद्धालुएं बाबा बर्फानी हुं'दी पवितर गुफा च मत्था टेकी लैता दा ऐ। माड़े मौसमी हालात ते भारी बरखा करी किश दिनें लेई बंद रौहने मगरा श्री अमरनाथ जी दी जातरा गी कल परतियै शुरु करी दिता गेआ हा। हुन मौसम च सुधार होने दे चलदे श्रद्धालु इक बारी फही सख्त सुरक्षा बंदोबस्तें हेठ बम बम भोले दे जयकारे लांदे जातरा मार्ग पर अगड़े बधा करदे न। तोआई जम्मू दे भगवती नगर यात्री निवास आधार शिविर थमां अज्ज बड़लै सख्त सुरक्षा बंदोबस्तें हेठ श्री अमरनाथ श्रद्धालुएं दा 19मां जत्था कश्मीर घाटी लेई रवाना

होआ। अधिकारिएं मूजब, अज्ज 166 गइडिएं दे काफिले च जम्मू थमां बरदाए गेदे जत्थे च कुल 4 जहार 474 श्रद्धालु बालटाल आधार शिविर लेई रवाना होए दे न। इंदे च 3 जहार 531 मर्द, 785 महिलां, 10 बच्चे, 96 साधु, 51 साध्वियां ते इक ट्रांसजेंडर श्रद्धालु बी शामिल ऐ। किश श्रद्धालुएं आकाशवाणी कन्नै गल्ल करदे होई अपना जोश इस चाल्ली बयां कीता ऐ

<><><><><><>

Kargil Vijay Diwas

अज्ज मुख्य भरै च लोक 1999 दे कारगिल युद्ध दरान अपनी जिंदू दी आहूति देने आहले भारती जवानें दी बहादुरी गी सम्मान देने लेई कारगिल विजय दिवस मना'रदे न। एह धयड़ा कारगिल युद्ध च पाकिस्तान पर भारत दी जित ते आपरेशन विजय दे कामयाबी कन्नै खतम होने दी 27मीं बरे गंड दा प्रतीक ऐ। इस अभियान दरान भारती थेआर बंद बलें जम्मू-कश्मीर दे कारगिल जिले दे उनें इलाकें गी परतियै अपने कब्जे च लेई लैता जित्थे पाकिस्तानी सैनिकें ते आतंकवादिएं अपने कब्जे च लेई लैते दे हे। तोआई, उपराज्यपाल मनोज सिन्हा होरें अज्ज कारगिल युद्ध दे बहादुर जवानें गी श्रद्धंजलि दिती। अपने स्नेह च उनें शहीदें गी सलाम कीता जिनें देसै दी सम्प्रभुता ते सम्मान दी राखी लेई सर्वोच्च बलिदान दिता। उनें आखेआ जे थेआर बंद बलें दी अविश्वसनीय दलेरी पीढ़िएं गी प्रेरित करदी रौहग। कल श्रीनगर च इक कार्यक्रम च कारगिल दे जवानें दी दलेरी बारै बोलदे होई उपराज्यपाल होरें आखेआ

<><><><><><>

Weather

मौसम विभाग नै 27 जुलाई यानि कल्लै धोड़ी अद्दे-दुब्बे तौरा पर बद्दल छाए दे रौहने ते प्रदेश दिएं टामीं-टामीं थाहें पर हल्की बरखा बरने दी पेशनगोई कीती ऐ। एह्दे परेंत 28 थमां 30 जुलाई धोड़ी परतियै बरखा बरने दे इमकान दस्से गे न। विभाग नै अगले 5एं दिनें लेई संवेदनशील थाहें पर चानचक्क हाड़ औने ते ल्हास-पस्सियां पौने दी शेंका जाहिर कीती ऐ। प्रशासन नै लोकें गी सलाह दिती ऐ जे ओह् सौहगे-सतर्क रौहन।

<><><><><><>

Highway

रामबन जिले दे रामसू इलाके च गांगरू थाहै पर कल पस्सी पौने करी जम्मू-श्रीनगर राश्ट्री जरनैली सिड़कै पर गड़्डिएं दी आओजाई प्रभावत होई ही। उ'आं मुकामी अधिकारिएं आसेआ फौरी सिड़कै परा मलबा हटाने ते उसी ब्हाल करने लेई अमले ते मशीनें गी कम्मै पर लाई दिता गेआ हा। हासल होई दिएं खीरली रिपोर्टें मूजब, गांगरू च सिड़कै दी इक लेन पर गड़्डिएं दी आओजाई ब्हाल करी दिता गेई ते सबनें शा पैहले बता फसी दिएं गड़्डिएं गी गै अग्गे जाने दी खुल्ल दिती गेई। इस बारै होर ब्यौरे गी अजे बलगेया जा'रदा ऐ। मती जानकारी साढ़े संवाददाता कोला

<><><><><><>